

SOGA ta cla pa cuminsa negocia cu ARIANO cu a gana bid di proyecto Hospital



ORANJESTAD (AAN): Renobacion y expansion di dr. Horacio Oduber Hospital, ta un proyecto PPP (Public Private Partnership) den

cual ta involvi FDA, SOGA y naturalmente AIB cu ta e instancia cu ta controla e dos organizacionnan mencionada. Friendsel Giel, direc-

tor di AIB, den un entrevista a papia riba e proyecto PPP di Hospital, cu ta uno basta grandi.

E ultimo desaroyo den e proyecto aki ta un carta cu a worde manda pa e dos contractistanan cu a keda. Den ultimo aña SOGA a bin ta traha duro riba ehecutacion di e proyecto di renobacion y expansion di dr. Horacio Oduber Hospital.

Despues di algun contratempo, a yega na e parti cu a keda dos contractista cu a worde selecciona door di e comision di seleccion, consistiendo di expertonan di e.o. AIB, representante di SOGA, di hospital, di Gobi-

erno y tambe cu conseho di un compania internacional. E comision a conseha pa scoge e contratista cu a score miho den e condicionnan cu a pone adelanta. Den e criterionan poni, e contractista ARIANO ta esun cu a score miho y a informa nan caba cu kier cuminsa cu negociacion.

Giel a splica cu ta papia di negociacion pasobra niun di dos companianan a cumpli cu e presupuesto cu SOGA a pone. E sumanan cu a pone ta hopi mas halto di loke a worde presupuesta. “Nos a sigui cu esun cu a score miho den e criterionan, cual tabata un proceso habri y transparente, y basa riba esaki ARI-

ANO a sali esun miho. Esaki apesar cu nan no tabatin e miho prijs. Pero den e fase aki prijs no tabata obhetivo, pero e cumplimento di cierto criterionan cu tabata claramente delinea den e documentonan di bidding.”

Awor, Giel a splica, ta bay cuminsa cu e fase di negociacion cu e compania ARIANO pero esaki no mag mishi cu calidad y embergadura di e proyecto. Giel ta spera cu por Sali di e fase aki den un periodo cortico pa por anuncia ki dia e construccion ta cuminsa. Si no logra, lo mester bay tuma un otro decision, entre otro si ta cuminsa cu e proceso di nobo.